

Fasnacht 2024



Kaffidante

Dä ligangsväärs wo mir jetzt singe, händ mir nit welle bringe
Mir händ uns aber dänngt s'isch wichtig dää do z'singe
Drum draage miir dää Väärs do vor, bevor's denn äine biesst
Schöön sind iir doo, Liebi Lüt, bevor die Bäiz au schliesst

Mii Maa, dä isch halt nit dr hällscht und au nit wiirgglig gscheit
Äär isch in siine Kinderdääg – in soonere Duubelischuel ummekeit
Den hoolet äär's noch, im Internet – Noohilff ooni Änd
Und noch em Abschluss isch'r denn – Künschtlig Intelligänt

Dr FC Baasel het e Griise- s isch äifach nur e Flop
Nuur d Fraue- die vom FCB – spiile wiirgglig top
Dr Voorstand weiss, s'goot nit so witer – s'muess äifach öppis lauffe
Jetzt göhn d'Männer, am näggschte Fescht halt Lööslig go verkauffe

Mii Digge dää isch beweegigsfuul, will Spoort, doo macht äär käiin
Spaziere im Zolli wääri boimig und hilfft dr Gsundhät ungemäiin
Drnoo het äär e Häärz, vomene Löö – sit äär döört aane goot
S'Aug vom Adler, s'Oor vom Wolf – und e lääbelang Zolli-Verbott

S'git Glöpfer die sind vollvegan, döört macht me Soja drii
Au Fläisch, säll isch uss Mungoboone- und sit noischtem veganem Wii
Dr Wissi isch vollvegan und für Käärnlibigger guet
Dr Rotwii, dä goot nit, dä isch halt gfäärbt mit Soilibluet

De glaubsch es kuum, im Comite – isch e Wunder gscheeh
Unser Comite, jä säll muesch gsee – hett emool e gueti Idee
Dr Baasler Zolli wird unterstützt vom Giiraff bis zer Muus
Nuur miesste d Dierli jetz uff d Strooss, und s Comite in's Affehuus

Mii Alt dä isch im Ruuestand, nur ummeliige säll git's nit
Äär laufft sithäär und das no gäärn- an alle Demos in Baasel mit
Äär leegt sich doorum – das demonschtriere – als nöi s'Hobby zue
Und will mir do in Baasel woone, haa i an de Wucheändi rue

Die ganzi Schwiz isch erliichteret, dr Schutz vom Wolf isch gfalle
Sit neuschtem daarf me, mit Bundessääge – wider alli Wölf abknalle
Au bi uns doo knallt's – läng mr's Gweer – s'isch bränzlig woni ghei
Denn hörsch e Schuss und denn e Schrei – s'isch s Comite – Vogelfrei

Mir baidi doo, sind alti Daame und wärde langsam ründer
Drum hän mir dänggt, nur Bio ässe wääri sicher gsünder
Ooni Gluete, biologisch, Vegan und dass püriert
Nur kunnts soowit, läbsch eso – wirsch am Änd denn komposchtiert

Wottsch au by uns bänggle?
Uff www.vsg-basel.ch erfahrsch meh!



Fasnacht 2024

SCHNAPS BAGGE

Letscht Joor am «Sächsilüüte» het dä Böög brennt und brennt
Dä Böög hett soo lang brennt, wie me das vo däm Böög gar nit kennt.
dr Brandmaischer: «As dä Böög so lang brennt hett, muess me verstoh,
mir hän zem aafyyre fuuli Papier vo dr Crédit Suisse gnoh».

Nit nur in de Gymnasie, au in de Kindsgi haissts: «Bring your own device!»
Das verzellt mir mi Änggelin, do han ych dänggt: Was sell dä Scheiss?
Sie derf eppis mitbringe vo dehai, wo im Kindsgi blybt, das sigi grandios.
Do sag ych: «kasch d’Grossmueter mitnäh, denn bin ych die los».

«Alle in Reihe aufstellen und Hosen runter,
Sie, da hinten: Schnauze halten, das wird ja immer bunter.
Wer den Test besteht erhält von uns ein Läckerliiii.»
Ojeh – bi der Basler Polizey stelle sie jetzt Schwoobe yy.

Ych ha letscht Joor vegan g’läbt und Wasser gsoffe
Tierli g’schtryychelt, ha s’Velo g’noh oder ych bi g’loffe.
Ha Gyyge g’spielt und bättet, aber s’hett nit g’stumme fir mi,
es sin die schlimmschte 30 Minute vo mim Lääbe gsi.

Mir lyytet Ain aa, schwätzt hochdytsch und y mergg: Aha, Änggeltrigg!
Är miess bi mir Schmugg und Gäld hole, he hallo, dä bringt’s digg!
Ich ybergib em e Däsche, mit volle Robi-Dog-Segg und ha bi mir dänggt:
«Da’sch jetzt Ain, wo nöggstents voll in d’Schissi längt!!»

Zircher hän e grossi Schnuure und d’Schwobe? – Die au!
Dr Trump isch e Trampel und d’Martullo-Blocher isch kai Frau.
Aargauer frässe Riebli, Blondine sin doof – das han y jetzt dervo
Ha mit KI noch Pointe gsuecht und das isch uuseko.

Falls es Tessiner do hett: Hey, cari amici, salutti a Tutti
Letschte Summer, Mamma mia, Tunello kaputti
wenn ihr d’Schnauze voll hän vo de Tourische, wo zue euch wän reise.
denn leend doch wieder emoll im Gotthard e Zug entglaise.

S’git Situatione, do dänggt me, s’hett sich alles gege aim verschwore,
do isch immene Schilangläufer bim Schilanglaufe dr Penis yygfre.
Däm keent’sch jetzt sage: «Päch gha, Alte, wie’s eso goot,
d’Klimaerweermig kunnt fir di aydyttig z’spoot.»

Ych ha e Uffdritt gha, do hän Fraue vor Begaischterig too, wie verruggt
und bim uuselaufe hett mir Aini – e Schmutz uff’s Muul druggt.
Ych ha se nit aazaigt, ych kenn das scho vo Verwandte,
und dängg mit Gruuse zrug an die nasse Schmütz vo mine Tante.

Wottsch au by uns bänggle?
Uff www.vsg-basel.ch erfahrsch meh!

Drugg: Amerbach’sche Druckerei, Basel



Fasnacht 2024



Mir zwai – mir sin zwai Pfadi-Buebe und sinn allzeit bereit
Und mir vollbringe alli Daag e gueti Tat – zu zweit
Schrüübli, Muetere und ganzi Fänschter – mir finde Recycling guet
das sammle mir – näb em Flùgplatz zämme – wenn e Boeing lande duet

Zu Euch ko singe kömme mir – nid z’Fuess – das wär fatal
Mir hän zwei Esel gmietet – die Demonstriere dusse – aber das isch normal
Mit Esel kunnsch – am Stau verbyy – das isch nämmlig s’tolle
Denn Esel hän – in dr Verkehrspolitik – no immer e führendi Rolle

Vau6, Biturbo, 260 schnäll – das isch e wahnsinns Kaare
Mit däm kasch in d’Kurve ligge – und Vollgas duure faare
Und dr Verglyych – mit Klimaklääber – finde mir famos
Au dä isch Grien – macht Lärm fiir nyt – und gläbbt super uff dr Strooss

Herr und Frau Storch – uff em Wäg nach Süde - die sin e bitz verkoo
Die hän gmaint – si heige – e super Abkürzig gnoo
„Mir sin glaub – scho in Afrika – kumm mir lande Schatz“
No mergge beidi – *Gopfridstutz* – si sin erscht am Clarablatz

Dr Odermatt hett’s no guet – das isch ganz e klare
Dä brucht aifach numme Schnee – zum rassig dr Bärg abfaare
Mir z’Basel mache – das bitz anders – do gseen mir nur no Rot
Mir hän halt – unseri Regierig – damit’s schnäll dr Bärg ab goot

Us dr Bangg – kömme zwei Käbeli use – find-i komisch neume-duure
E paar Sekunde speeter denn – haut’s uns dr Bancomat um d’Schnuure
Drey Type renne – denn dervo – was hän sich die ächt dänggt
Die Duuble hän – dr leer Bancomat – vo dr CS gsprängt

Öb Maa oder Frau – egal was du – zwüsche de Bei duesch drage
Was du bisch – kasch sälber bestimme – muesch es aifach saage
Bald ka das – au d’Tierwält mache – vielleicht e Sau – grad vor em stärke
Öb’s lieber e Schnitzel – oder ächt – e Broccolisuppe möcht wärde

S’Artestäärbe isch e Problem – Ornithologe sin besorgt
Dr Geier würd langsam verschwinde – und das an jedem Ort
Dr Eric Wäber - isch verschrogge – und luegt jetz komisch dryy
Wenn das bassiert – würd är nämmlig – dr hässlichscht Voogel syy

Wenn e Bär - und sone Steibock würdi – also rein hypothetisch gsee
Wenn also e Bär e Bock – so fröhlich im Wald würd nee
Das gäb e übli Krüzig – aber es wär no heiss
Denn hätte mir – zumindescht im Wald – aus sone Baerbock-Geiss

Am Samschtig do froog yi – söll i ins Joggeli an Match
Oder bliib yi deheim – die schutte nur Quatsch

*Refrain: Nach dem Däge schiint d’Sunne
Nach em hyyle wird glacht
Doodi doodi doodi-o nach em hyyle wird glacht*

Also bin-yi ins Stadion – deert hän mir vyy! Durscht
und wenn si verliere – isch’s nach 6 Bier au Wurscht

Refrain

Uff dr Aazeig stoot Nüll – und bim Gegner scho Vier
Do hilft denn nur ains – yi hol no e Bier

Refrain

I merg denn scho bald – do müen mir jetz duure
Gege d’Manne us Lausanne – griege mir sicher uff d’Schnuure

Refrain

Als Erinnerung im Joggeli – nimm yi’s Händy mach Fotteli
Wo i lueg uff die Fotteli – gseen yi alles nur Dotteli

Refrain

Jetzt muess i no haim – ich gsee schitter dri
und wärs nid scho gnueg – faart s’Maischter-Drämmli yi

Refrain

Am Clarablatz – deert wohn-yi – will zu Frau und zum Kind
Denn schisst mir ä Storch – no voll uff e Grind

*Refrain: Nach dem Däge schiint d’Sunne
Nach em hyyle wird glacht
Mir göhn jetz ein witter –«Sali zämme und scheeni Fasnacht»*

Wottsch au by uns bänggle?

Uff www.vsg-basel.ch erfahrsch meh!



Fasnacht 2024

Schnitzel-Bangg

Dr Strom isch efang dyyr und zimmlig knapp
si stelle'n'en villicht emol bletzlig ab
ych ha vorgsorgt und ha e Staubsuuger kauft
und zwar aine wo ohni Kabel lauft
wenn's kai Strom het, haut's mi nid uss de Fuege
ych ka jo au bi Keerzeliecht Färnseh luege.

Im Wältruum sinn d'Aschtronaute wie wild am Schaffe
denn verliere si s'Wärggzyyg, die bleede Affe
jetz fliegt die Kische um d'Ärde umme
mit däm Wärggzyyg dinn vo däne Dumme
aber s'Schlimmscht isch halt fir die Schbezialishte
ihres Znyni liggt au no in däre Kische.

Dr Howard Carpendale, wär kennt'n nid dä Maa
dä hett do e Härzattagge uff dr Biihni gha
denn hänn's en sofort um s'Härz massiert
und mit em Defibrilator reanimiert
wo'n'är wiederbeläbt isch nach däre Pain
het'r d'Auge uffgmacht und gsait, «Hello again».

Unseri Noochberslyt, e ältere Ehepäärli
är haisst Päuli und si nennt sich Marie-Klärl
si sin nid immer glycher Mainig die Zwai
drum hänn si zwischeduure au Lämbe Dehai
fryehner het är zu ihre gsait, kaine liebt di eso wie'n'ych
und hit sait är, kaine liebt Di, wieso eigendlig ych?

Au e Bundesroot kennt emol, das wär no glatt
in'ere Färnseh-Show mitmache ass Kandidat
d'Frau Amhärde zem Byschbil, eso zem Gschbass
ass Hochditsch-Expärin im «Wetten dass,...»
dr Beat Jans kennt bi «1 geze 100» s'Beschte gäh
und dr Parmeläa wurde si grad no bi «Bares fir Rares» näh.

Dr Kevin sait zem Omi Edeltraut
jetz ha'ni mit mym Auti e Huffe baut
mit Alkohol am Styrr, das isch e Drägg
jetz nämme die mir s'Billjee wägg
bewirb Di doch het si schbontan d'Idee
ass Chauffeur bi dr BVB.

Uff dr Dreyroosebrugg hänn die Gladde
eso Pflänzli pflanzt schyyns wägem Schade
mit däne Minipflänzli hänn si's nid ganz braicht
wo'ni das seh ha'ni vor lache grad in d'Hoose gsaicht
das het nyd mit kinschtlicher Intelligänz z'due, die Pflanzerey
s'isch ainzig und elai d'Intelligänz vo dr Stadtgärtnerey.

D'Frau Gass het d'Frau Schild droffe bim schbaziere
no maint si, was saage si au zu däne vyyle Yybrüch wo immer bassiere
no sait d'Frau Schild, i mag hit nid schneere,
y ha so Kopfweh s'isch zem gruuse
dr Doggter het zwor gsait ych sell z'Nacht bi offenem Fänschter pfuuse
het's nyd gntzt, isch's Kopfweh nid ewäg, Frau Schild
nai, nid ewägg, aber wäg däm offene Fänschter drfir my Portemonnaie
und e Bild.

Es gitt e Huffe Löcher, wie s'Globus-Loch
s'gitt e Muusloch, e Bohrloch und s'Januarloch
s'gitt e Schlisselloch, e Gnopfloch und s'Naselloch
s'Ozonloch, s'Schlagloch und s'Gotthard-Loch
denn no s'Loch im Ämmidaler dinn
am Schluss kunnt mer nur no dr Putin in Sinn.

D'Barbie hett sich gmalde bi Bauer sucht Frau
do sait dr Bräntehueber-Sepp, aber bitte im Stall kai Modeschau
si sell mol im Gaissestall go iine gnaisse
deert passt si jo guet zu de magere Gaisse
Schmätterling im Buuch hett dr Sepp kaine, aber zwor
hett er jetz e rosarote Hof und e pinkige Traktor.

BÄFFZGI-GUETSCHYN:

WENN DU DÄ ABSCHNITT ABRYSISCH UND UNS GISCH
BYKUNNSCH DERFIR E NEJE WO NIT VERRISSE ISCH.

www.bäffzgi.ch

Wottsch au by uns bänggle?

Uff www.vsg-basel.ch erfahrsch meh!

Drugg: Amerbach'sche Druckerei, Basel



Fasnacht 2024



Nachtschwärmer

Als Maa wird's mir, gendergerächt
Jetzt au jeede Monet schlächt
Ha Monetsbeschwärde, y ka's nid fasse
Bym Zaale vo dr Granggekassee

Wäg dr Granggekassee, s'isch z'beduure
Kai Gäld me fir Raise in fääрни Kultuure
Zem treeschte maint my liebe Schatz
Denn göönd mir halt zem Claarablatz

Es git Lyt, wo druff wette
Mit Kl ka me d'Ärde rette
Me het's probiert, und denne gsee
Au daas hilft nid bim FCB

Ändglaisig im Gotthard vom e Gieterkaare
Zyyg miend oobe duure faare
Dr Jositsch hätti daas begriesst
Wenn äär nimmi unde duure miesst

E Poller in dr Dable, das kasch nit loobe
Kuum draakoo, liigt dää scho am Boode
Dää Poller, ains isch wirgglig klaar
Benimmt sich wie e Fuessballstaar

Es isch fangs zem verregge
Energie spaare muesch a jeedem Egge
Energie spaare, das kasch gsee
Bi jedem Spiel vom FCB

Die E-Vignette kunnt uns glääge
Die Erfindig isch e Sääge
Kläbrigi Sache sind nimm dr Hit
Syt's Klimaaktivischte git

Bim Stadt-Lauf mache mir gärn mit
Ganz klaar, die Schnällschte sind mir nid
By jeeder Rundi, s'losst uns kai Rueh
Macht scho wieder e Hotel zue

Fir alli wo in Baasel woone
Gits allerlai Erhooligszoone
Die bescht Erhoolig, het per se
Uf em Raase, dr FCB

Bombealarm bym Euroairport, noodisnoo
S'ganz Resslerspiil muess als koo
Vyyt Umtrieb fir nid, maint dr Ysatz-Chef
S'isch ganz esoo, wie bym WEF

Bi dr Domina hesch fir Gwaale
Als e Hufte miesse zaale
Hyt git's das graatis, das isch s'Bescht
An jeedem Eritreer-Fesch

Wottsch au by uns bänggle?
Uff www.vsg-basel.ch erfahrsch meh!



Fasnacht 2024



Ich läb jetzt vegan, aber es macht mir au Müeh:
Zum Haize, do fäälä mer d'Fürz vo de Kueh.

Üsi Alpegipfel schrumpfe, nur dr Mönch stellt si Ma
scho elf Meter höher – weg dr Jungfrau näbe dra?

Bi jeder Wahl zum Bundesrot, – da fegt und het en Groove,
Taucht ab jetzt als Running-Gag, dr Jositsch Dani uf.

D Frau Baume-Strich-Schneider het's nid ganz im Griff.
Drum muess jetzt dr Beat uff ,s sinkendi Schiff.

Wenn Dir was Gutes wiederfährt –
Das ist schon einen Korb mit Lägerli wert.

Es chuunt mir grad glege, I dör da do sege:
Mit dm Sege vom Dege, stoht jede im Rege.

`s Basler Theater, isch glyy scho am Änd.
Si spiele jetzt nur no: dr Bäätelstudent.

Wenn ,s all fünf Minute, so tschättet und knaggt,
Denn sait me däm hüttä: soziale Kontaggt.

Wenn d'Klimachleber chlebe, denn höckle sie ruhig do.
Das wird jetzt bi ADHS in Lehrplan ufgnooh.

D'Klimakleber kleben besser –
d'Klimakleber kleben gut!

Dr Läderach schloot Chinder, – verhaut ene de Grind
Jetzt weiss i, für wa do, diä Schoggibrüggeli sind.

Läderach macht Kinder froh,
und die Erwachsenen ebenso.

Me seit nüm Papi oder Mami, me möchte's jetzt Gender frei:
das isch jetzt Begleiterin mit Hode, und Eileiterin mit Ei.

Seisch Aus!! Dym Hund, am Barri, denn losst er di in Rueh.
Seisch Aus-Länder!! bi dr SVP, denn bissä sie erschrt recht zu!

Gwüssi Würdeträger und Pfaffä, – nei e Würd hän sie kai
«Die Würde», wo sie trägä – bambelät zwüschä de Bei.

Dr Köppel macht Wärbig, in Moskau für d' Schwyz.
Und molt uff si Fahne, no Högge ans Kryz.

Mini Vers wo i sing, sind vom Intellekt her perfekt;
Es fäählt änä halt immer no dr recht Dialekt.

Hüt bin i e Maa. Und morn bin i s au.
Jetzt hoff i, my Frau, isch au morn no e Frau.

Trotz Defizit und Schuldebremis, – die Chance – me looht se fahre.
Heete mir dr Wahl vom Pult, än Schribtisch chönä spare.

Fünf Fraue isch ,s Billet ins Bundeshuus groote.
I frog mi als Ma jetzt: wie isch ,s mit de Quuoote?

Wottsch au by uns bänggle?
Uff www.vsg-basel.ch erfahrsch meh!



Fasnacht 2024



S Daameryschli

Mit em Kopf dur d Wand, das bringt en us dr Rue
Kunnt em Xhaka aine blööd, so haut är au mol zue
Är heigs doch esoo gleert, verzellt är uns schweissnass
Är sigg halt für e Wyyli bim Läderach in d Klass

Maint d Frau Saarasiin zu ihrer Fründin: «Gopfridstutz!
Syt unsere Ferie lauft mym Schatz im Bett dr Schnyydelwutz
Wild und stiirmisch zuggt är umme – wie in ere Romanze
Und alles nur dangg däne französische Bettwanze!»

Wyt oobe in de Schwyzerbärge het me e Yeti gsichtet
Vyyli Medie hän denn grad über die Sichtig brichtet
Dasch gar kai Yeti het me gmerggt, dä kunnt us ere andere Spaarte
S isch e Schirennfahrer, wo immer no uf d Zermattabfaart duet waarte

D Waale in Amerika sin wiider lanciert
Wirds dr Biden, dr Trump oder e andere, wo denn das Land regiert?
Mir hän uusegfunde – das isch e diggi Kischte!
Jetzt stoot deert schiinbar neu no dr Jositsch uf dr Lischte

Im Zuug vo Bärn noch Ziiri – 1. Klass im Waage 3
«Wo kani hogge?», frogt do ain, “es het kai Platz me frei!»
Dr Kontrolleur will s Billjee gsee und lächlet denn e bitz
«Herr Jositsch für sie hätts no in dr 2. Klass e Sitz!»

«S Züri-Fäscht» wird das Joor nimmi duuregfiert
Neu het me de Aaloss dr Zyt entsprächend optimiert
Schiints bruucht me das Gäld, dä Platz und d Ländereie
Für die neggschte grosse Eriträer-Schleegerie

Riisealarm z Berlin e Wildtier isch am jaage
Alli selle dinne blyybe, s herrscht grosses Unbehaage
Bi neecherer Betrachtig vo däm Tierli merggt me glyy
Das isch nur s Angie Merkel am Pilzli sammle gsy

Italiänischi Tourischte ströome duur d Bäärge vo dr Schwiz
S sigg wäg dä fründligge Mensche do und nit nur wäg dr Hitz
Sogaar uf italiänsch griesst me – s sigg fascht wie dehai
Z Brienz zum Byschpiil saage alli «Achtung! Come Stai!»

An dr Fifasitzig wird heftig diskutiert
Wo findet die neggscht WM statt? Wär het am maischte gschmiert?
Wo duet me für die junge Burschte ächt am beschte soorge?
Schiints het sich dr Vatikan liebend gärn bewoorbe

Im Dungle schlyychsch vo Huus zu Huus, s isch alles dubioos
E Bligg uf d Syte und denn schnäll e Salto über d Strooss
Schritt für Schritt dr Wand entlang – jo kai Risikoo!
Nur esoo kasch no hail duur s Glaibasel duure koo

«Dört isch linggs, nei doo ischs doch – jetzt kummi nimmi druss!»
«Mir mien fiire, das isch hindere – was schwätzisch du für Stuss?»
Orientierigsloos, kai Plan was lauft, do mergge mir scho glyy
Ka das nur e Spieler vom FC Basel syy



Wottsch au by uns bänggle?
Uff www.vsg-basel.ch erfahrsch meh!





ChatzGPT

I frog ChatzGPT, wieso bini immer blank
d Krankekasseprämie stigt, am änd vom Monet hani nüt meh uf de bank
Hösch nid mol s Shopping im Dütsche hilft,
ich hans langsam satt.
D Antwort: Schmeiss eifach e Wahlparty, denn zahlt dr alles d stadt

Schuggerei

Bischd du aus Deutschland, dann komm zur Basler Schuggerei
Kannst du gut mit Menschen, dann bischt du fascht dabei
Möglichkeit auf Homeoffice
bi anderne dehei,
Nur fahrende Autos, das hämmer leider kei

Trump

En neue exporthit usem botanisch garte,
chaufe cha me en nid, es hilft au kei warte
De trump het scho alles für sich bestellt,
es isch ganz fatal
är träit neu, Titanefurz, cologne de uni bale

Grossi Root

E Sicherheitspaket sölls gäh im grosse Root
Dört gseht SVP momentan e grossi Not
Sie wänd Kameras, Belüchtig
e ganzes Studio
nid für d Sicherheit, nei sie dräie e Musikvideo

Fasnacht

Du ich glaub mir bloose d fasnacht das johr ab,
normalerwiis seit sie em winter jo hau ab
Doch elei bi däm gedanke,
duets mr jetzt scho weh
I mag mini klima alag nümme schwitze gseh.

Jans

Ändlich hämmers gschafft, habemus Bundesroot
De Beat Jans dä freut sich, dass är uf Bärn goht
Bi de Fiir schnappt är de schämpis,
und heten hindere gheit
Jo, är ersetzt de Berset ade nögschte Street Parade

Elon Musk

De elon musk hedd endlich expandiert
hed ufm mars sis neu dihei platziert
Nume s dumme jetzt isch,
är chunt nüm zrugg, dä gwaggel
D klimakläber hänge a sim shuttle

Cramer

De Cramer dä will meh integriere
ein vo sine lehrer duets frustriere
Är het d schüelerlischte gläse,
ei name gfallt em nid
De eric wäber het si schuelitritt

Demotour

Do rächts e Demo, gäg d klimadiktatur
do links au eini, gäg demo gäg d klimadiktatur
Do vorne no en fanmarsch, das wärs gsi,
stiege sie bitte us.
danke fürs vertraue, ihre basel city bus

Wottsch au by uns bänggle?

Uff www.vsg-basel.ch erfahrsch meh!

